

Èkwo-ozì Kẹ̀ Mbù, Jìonu Deru

Opfu, bụ ndzụ, shi Chileke l'ẹka

¹ Iphe, anyi ede l'ẹkwo-ozì-a anụ unu-a bụkwa k'onye ono, ẹpha iya bụ Opfu Chileke-a, bụ iya bụ kẹ Opfu, bụ ndzụ, shi Chileke l'ẹka-a. Opfu ono, anuje ndzụ ono shikpọ lẹ mbulembu dū. Anyi nūmakpooru iya lẹ nchì; bya ahuma iya l'ẹnya; gbua ya ẹnya igo; bya ebyia ya ẹka. ² Onye ono, bụ ndzụ ono bẹ e meru k'ọphu eegudeje ẹnya huma iya; anyi humawa iya. Ọ bụru iya bẹ anyi aturu unu ọnu iya-a, bụ iya bụ kẹ ndzụ ojejeje onoya. Ndzụ ono bụ yẹ Chileke, bụ Nna shihawaa nọduta. Chileke bya egoshiwa iya anyi; mee anyi maru iya. ³ Ọ bụ iphe ono, anyi humaru l'ẹnya bya anuma lẹ nchì ono bẹ anyi akọkwarupho unu-a g'anyi l'unu atugbabe onwanyi. Atugba ono bụ atugba ọphu anyi lẹ Chileke, bụ Nna waa Nwa iya, bụ Jizosu Kéreshi tugbaru. ⁴ Iphe, anyi ededoru unu iphemiphe-a bụ g'ẹhu atsofu anyi l'unu uto l'ishi.

Chileke bụ ìphóró, ngarụ ẹgu

⁵ Ọwa-a bụ ozi, anyi nūmaru iya l'ọnu; bụ iya bẹ anyi akọru unu-a, bụ iya bụ lẹ Chileke bụ ìphóró; ọchii ta adudu iya ililekpoo. ⁶ Teke anyi sūru l'anyi l'iya tugbaru onwanyi; l'ẹka anyi nọ l'ọchii; bụkwa ụka bẹ anyi adzụ; tẹme ọphu anyi

emedu ire-lanụ. ⁷ Obenu teke anyi bu l'ìphóró gẹ yẹbedua nọ l'ìphóró-a; ọo ya bụ l'anyi lẹ nwibe anyi tughbaru; mee Jizosu, bụ iya bụ Nwa Chileke nọdu asafukotaje anyi iphe-ẹji, anyi meru g'ọ ha.

⁸ Teke anyi sụru l'anyi te emedu iphe-ẹji bukwa onwanyi bẹ anyi aghọru ugho; tẹme ọphu ọkpobe-opfu ono adudu anyi l'ẹhu. ⁹ Teke anyi koshiru iphe-ẹji, anyi meshiru b'oo-guru anyi nvu l'iphe-ẹji ono g'ọ ha; bya asafukota anyi iphe, bukota ẹjo umere, anyi eme; eshinu ọ bụ onye apfushije ike l'iphe, o kweru ukwe iya; bya aburu onye emeje iphe, pfuru ọto. ¹⁰ Teke anyi sụru l'anyi te emeduru iphe-ẹji bẹ anyi mewaru iya onye ntuphu-ire; tẹme ọphu opfu iya adudu anyi l'ẹhu.

2

Kéreshi agbajeru anyi mkpu

¹ Unwegirima mu; iphemiphe-a bẹ mu edekwaru unu l'ẹkwo g'unu te emeje iphe-ẹji; ọle teke ọ duru onye meru iphe-ẹji bẹ anyi nwekwaru-a onye epfuchiru anyi l'iphu Nna anyi. Onye ono bụ Jizosu Kéreshi, bụ onye pfuberekoto. ² O woru onwiya gwee ẹja ọha; gude gwefu iphe-ẹji, anyi meshiru mękpoo iphe-ẹji, ndu mgboko mgburugburu meshiru; ọ tọ bụdu-a ọphu anyi meshiru nwekiya.

³ Teke anyi emeje iphe, Chileke turu ekemu sụ g'e meje; ọo ya bụ anyi amakaharu l'anyi maru iya. ⁴ Onye sụru lẹ ya maru iya; ọphu oomedu iphe, ọ turu ekemu sụ g'e meje bụ onye ntuphu-ire; ọkpobe-opfu ta anọdu iya l'ẹhu. ⁵ Obenu

l'onye eme iphe, Chileke pfuru bẹ̀ bụ̀ onye yeru Chileke obu yefukpọ̀o ya ya l'ishi. Noo iphe, e-me g'anyi makaharụ̀ l'anyi l'iya tughbaru buru nanụ̀ bụ̀ onoya. ⁶ Onye sụ̀ru lẹ̀ yẹ̀e Chileke tughbaru bẹ̀ ọ̀ gbaru kẹ̀ g'ọ̀ nọ̀du ẹ̀gube ndzụ̀ ono, Jizọ̀su shi nọ̀du ono.

Ekemu òphúú

⁷ Ndu mu yeru obu; ekemu-a, mu ederu unu-a ta abụ̀ekwa ekemu òphúú; ọ̀ bụ̀waa akahụ̀ ekemu, unu shikpọ̀ lẹ̀ mbụ̀lembu nweru; akahụ̀ ekemu ono bụ̀ ozi, unu nụ̀mahawaru. ⁸ Olee mu edekwaru-a unu ekemu òphúú; kẹ̀le ọ̀kpobe-opfu iya ono bẹ̀ a gbẹ̀ nụ̀mawaa l'ẹ̀hu Kéreshi waa l'ẹ̀hu unubẹ̀dua; noo l'ọ̀chii abvụ̀waa abvụ̀bvụ̀; ọ̀kpobe ìphóró gbẹ̀ shiwaa unu l'ẹ̀hu abyawaa adụ̀du.

⁹ Onye sụ̀ru lẹ̀ ya nọ̀ l'ìphóró ono; tẹ̀me nwanna iya dụ̀kwa iya phọ̀ ashị̀ bẹ̀ bụ̀kwa l'ọ̀chii bẹ̀ ọ̀ nọ̀kwadu byasụ̀ nta-a. ¹⁰ Onye yeru nwanna iya obu nọ̀ l'ìphóró ono; ẹ̀be ọ̀ dụ̀du iphe, onye ono emejekpọ̀o bụ̀ iphe, e-me g'onye ọ̀zo dalahụ̀ l'eme iphe-ẹ̀ji. ¹¹ Obenu l'onye nwanna iya dụ̀ ashị̀ nọ̀ l'ọ̀chii ono; tẹ̀me ọ̀ nọ̀du eje daadishi l'ọ̀chii; ọ̀phu ọ̀ madụ̀ ẹ̀ka ooje; kẹ̀le ọ̀chii ono mewaru ẹ̀nya gbahụ̀kota onye ono tsụ̀kiribaa.

¹² Mu ede ẹ̀kwo-a anụ̀ unubẹ̀ ndu bụ̀ unwegirima; kẹ̀le Chileke gudewaa k'ẹ̀hu Jizọ̀su gụ̀aru unu nvụ̀ l'iphe-ẹ̀ji, unu meshiru. ¹³ Mu ede iya anụ̀ unubẹ̀ ndu bụ̀ nna; kẹ̀le unu maru onye ono, shi lẹ̀ mbụ̀ dụ̀ onoya. Mu nọ̀du ede iya anụ̀ unubẹ̀ ndu bụ̀ okorọ̀bya; kẹ̀le unu lwụ̀kpewaru Onye-Njọ̀ ono, bụ̀ Obutuswe l'ọ̀gu. Mu

ede iya anụ unubẹ ụnwegirima; kele unu maru nna ono.

¹⁴ Mu dewaru iya nụ unubẹ ndu bụ nna; kele unu maru onye ono shi lẹ mbụ dū onoya. Mu bya edewa iya nụ unubẹ ndu bụ okorọbya; kele unu shihuru ike; opfu Chileke buru unu eburu l'ẹhu; ẹme unu lwụ-kpewaa Onye-Njọ ono, bụ Obutuswe.

¹⁵ Unu te eyekwa mgboko-a ẹnya; ọzoo iphe, dū iya l'ime. Onye yeru mgboko-a ẹnya bẹ te eye-kwaru Chileke bụ Nna ẹnya. ¹⁶ Kele iphemiphe, dū lẹ mgboko-a, bụ iya bụ ẹgu ẹjo-iphe, agụgbaa nemadzụ; waa ẹgu enweru iphemiphe, ẹnya humaru; mękpoo eku-onwonye ọ-phushia-ugbu l'iphe mgboko-a ta abụkwa l'ẹka Nna bẹ o shigbaa; ono shigbaa lẹ mgboko. ¹⁷ Mgboko-a mę iphe, dū iya nụ, bụ iphe, agụgbaa nemadzụ tükokwaru abyawaa ephushihukọta; obenu l'onye eme iphe, dū Chileke l'uche a-dzuru ndzụ jasụ lẹ tuutuutu lẹ mịimiimii.

Onye-achi-nta-Kéreshi

¹⁸ Ụnwegirima mu; nta-a buakwa teke ik-pazụ. Unu nụmawaru l'onye-achi-nta-Kéreshi l'a-bya. Nta bẹ ndu achi-nta-Kéreshi duakwa igwerigwe. Ọ buru iphe ono meru g'ọ gude anyi maru lẹ nta-a bụwaa teke ikpazụ. ¹⁹ Ndu ono shikwa l'echilabọ anyi lufu; anyi l'ẹphe shihaakwa nọduta; ọle ọ tọ dudu teke ẹphe bụjeru anyi. Ọme ẹphe bụ anyi mę anyi l'ẹphe anọdukwa; obenu l'ẹphe lufuru g'ọo-buru iphe, doru ẹnya l'ọ tọ dudu g'ẹphe ha mę onye lanụ, bụ anyi.

20 Obenu l'unubèdua bẹ Kéreshi yewaru Unme-dù-Nsọ l'èhu; unu makọtaru iphe ono, bụ ọkpobe-opfu ono. 21 Sụ-a; iphe, mu ededoru unu ẹkwo-a ta abụkwa l'unu ta amadụ ọkpobe-opfu ono. Ọ kwa l'unu maru iya; ẹme unu makwaruphọ l'ụka g'ọduhabe ta abụdu l'ọkpobe-opfu bẹ ooshije.

22 ?Buhunu onye bụ onye taru ishi k'adzu ụka, abụdu onye ekwedu l'ọo Jizọsu, bụ Kéreshi ọbu, Chileke kweru ukwe iya. Noo onye bụ onye-achi-nta-Kéreshi bụ ono; mbụ onye jikaru Nna jika Nwa. 23 Kẹle onyemonye, jikaru Nwa jikawaru Nna. Obenu l'onye kwetaru kẹ Nwa bẹ woakwaruphọ onwiya tugbabe l'èhu Nna.

24 A bya l'èhu k'unubèdua; mu sụ g'ozì ono, unu nùmaru eshi lẹ mbụ ono nọ-shiekwapho unu ike l'ọkpoma; g'unu gudeshia ya ike. Ọ -buru l'iphe ono, unu nùmaru eshi lẹ mbụ ono nọ-shiru unu ike l'ọkpoma; noo ya bụ; unu lẹ Nwa mẹ Nna atugba buru nanu; g'unu tugbaru iya kwaseru. 25 Ọwa-a bụ iphe, Kéreshi kweru anyi ukwe iya, bụ iya bụ ndzu ojejoje.

26 Ono bukwa kẹ ndu eme g'ephe mee unu mkpurukpuru-nya; duswee unu ụzo l'iphe kẹ Kéreshi bẹ mu deru unu ono. 27 Obenu l'unubèdua bẹ Chileke yewaru Unme-dù-Nsọ nkiya l'èhu. Mkpa onye ọzo, ezi unu iphe ta adueduru unu; eshinu Unme ono ezikọtaje unu iphemiphe; ẹme iphe, oozije buru ọkpobe-opfu; ọphu ọ dudu ụka, dụ iya nù. Ọo ya bụ; unu lẹ Kéreshi tugbakwa buru nanu g'unu tugbaru iya kwaseru. Nokwa iphe Unme ono ziru unu bụ ono.

28 Nta-a bụ lẹ-a; ụnwegirima mu; unu l'iya tughakwa bụru nanu g'unu tughbaru; g'oburu teke o goshierupho onwiya g'obu eshihu anyi ike g'anyi te egude iphere tsuhu iya ebvu teke oobyu. 29 Teke o bụ l'unu maru lẹ Chileke bụ onye pfuberekoto; g'o dokwaapho unu enya l'onyemonye, eme iphe, pfuru oto be bụ nwa, Chileke nwuru.

3

Aburu unwu Chileke

1 Unu humaru egube ge Chileke, bụ Nna yebewaru anyi obu ke g'o kua anyi unwu iya; teme o buru iphe, anyi bụ bụ ono. Iphe, meru iphe, ndiphe amadu anyi bụ l'ephe ta amadu iya. 2 Ndu mu yeru obu; nta-a be anyi buakwaa unwu Chileke. Iphe, anyi e-mechaa buru teke afutakwa; ole iphe, anyi maru bụ lẹ teke Kereshi byaerupho be anyi a-du g'o du; eshinu o buepho g'o du bụ g'anyi a-huma iya. 3 Noo ya bụ; onye o Jizosu l'eka ele enya abyabya iya ono; l'a-bujeru onye duebe ree; lẹ Jizosu obu l'onwiya be bukwa onye duebe ree.

4 Onyemonye meru iphe-eji be ikpe nmaakwaru l'o mebyiru ekemu Chileke; kele eme iphe-eji bụ emebyi ekemu Chileke. 5 Unu maru l'oo Kereshi obu byaru g'o bya ewofu nemadzu iphe-eji l'ehu; teme yebedua l'onwiya ta adukwa iphe-eji, du iya l'ehu. 6 O to dukwa onye yee Kereshi tughbaru buru nanu emejekwadu iphe-eji; ophu o dukwa onye emeje iphe-eji humajewaru iya nu; ophu o buro k'amaru iya amaru.

⁷ Ụnwu mu; unu te ekwekwa g'ọ duru onye e-duswee unu ụzo l'iphe ke Kéreshi. Onye eme iphe l'ụzo, pfuru ọto be bukwa onye pfuberekoto ge Kéreshi bukwapho onye pfuberekoto. ⁸ Onye eme iphe-eji bu ke Obutuswe; kele Obutuswe anọduje emeswe Chileke e -shikpoo le mbu. Iphe, Nwa Chileke byadoru bukwa g'o mebyia iphe Obutuswe eme emebi.

⁹ Onyemonye, Chileke nwuru te emejeedu iphe-eji; kele Unme Chileke l'erewa ire l'ehu onye ono; k'ophu o to byadu emeje iphe-eji; eshinu o bu Chileke nwuru iya. ¹⁰ Waa g'ee-gude maru ndu bu phe bu unwu Chileke; me ndu bu unwu Obutuswe bu owa-a: onyemonye ete emejeedu iphe l'uzo pfuru oto te shikwa le Chileke; ophu onye eyeduru nwanna iya obu eshikwapho le Chileke.

Eye nwibe onye obu

¹¹ Unu makwaru l'ozima ono, e shi le mbulembu zita unu ono bu g'anyi yee nwibe anyi obu. ¹² G'anyi ta adukwa ge Kenu. Le Kenu nokwa l'eka Onye-Njo ono, bu Obutuswe gbua nwune iya. Su-a; ?bu gunu kparu iphe, o gburu nwune iya obu? Iphe, kparu iya nu bu le Kenu obu l'onwiya be umere iya du eji; umere ke nwune iya buru umere, pfuru oto.

¹³ Unwunna mu; g'o to dujekwa unu biribiri l'unu du ndiphe ashị. ¹⁴ Ophu anyi makpodaru bu l'anyi shi nwuhu anwuhu; ole anyi shiwaa l'anwuhu ono futawaa; bahu le ndzu. O buru iphe, anyi gude maru l'o noo g'o du bu ono be bu l'anyi yeru unwunna anyi obu. Onye te eyeduru

nemadzu ibiya obu be nwuhukwaru anwuhu g'ò nwuhuru. ¹⁵ Iphe, bukpo onye nwanna iya du ashi buakwaa ochi be o gburu; unu maanaru-a l'onye gburu ochi be ndzu ojeje ta nodu l'ehu. ¹⁶ Su-a; g'anyi gude maru iphe, bu eye obu bu le Kereshi haru g'e gbua ya l'opfu ehuru anyi. Oo ya bu l'anyibedua be o rwubekwarupho ahaje g'e gbua anyi l'opfu ehuru onye anyi l'iya tukoru nodu Chileke l'eka. ¹⁷ Ole teke o bu l'o duru onye eku mgboko-a byaru; o buru onye yee ya tukoru nodu Chileke l'eka be mkpa byaru; obeta ophu ogbaru iya mkpu o kpo-chiaru iya okpoma; ? bu gunu be egube onye ono a-gbabe okpa su le ya yeru Chileke obu? ¹⁸ Unwegirima mu; g'anyi te eyejeshi obu l'onu l'onu; g'anyi gudeje umere goshi l'onye-a be anyi yeru pho obu eviya.

Enweru okpoma l'iphu Chileke

¹⁹ Oo ya bu; anyi -nodu eme nno; anyi egude iya maru l'anyi shi-a l'okpobe-opfu ono. Qobuwaru iya ro be anyi e-gude mee g'obu kabaa anyi eshihu ike l'iphu Chileke; ²⁰ me o -duru teke obu anma anyi ikpe; kele Chileke ka obu anyi shii; teme o maru iphemiphe. ²¹ Unwunna mu; o -buru l'obu ta anmajedu anyi ikpe; bunu iya bu le ndzu ta aguedu anyi l'iphu Chileke. ²² Anyi anataje l'eka iya iphe, bukpo iphe, anyi suru g'o nu anyi; kele anyi emeje ekemu, o turu; teme anyi nodu eme iphe, du iya ree. ²³ Iphe, bu ekemu ono, Chileke turu su g'anyi meje ono bu g'anyi woru onwanyi ye l'eka Nwa iya bu Jizosu Kereshi; wafua g'anyi yee nwibe anyi obu, bu iya bu iphe, o turu

anyi l'ekemu sù g'anyi meje. ²⁴ Onye emeje ekemu Chileke bẹ bukwa ebubu l'ime Chileke tẹme Chileke bukwaruphọ l'ime iya. Iphe, anyi egudeje maru lẹ Chileke bu l'ime anyi bụ Unme iya, ọ nūru anyi.

4

Unme Chileke l'unme Obutuswe

¹ Ndu mu yeru obu; ọ tọ bụebekwa ndu sūru lẹ Unme Chileke bu phẹ l'ẹhu bẹ l'a-bujeru ẹphe -pfua iphe; unu ekweta l'ọ bụ eviya. Unu dalejeadakwaa ya adale g'unu maru; ?Unme ọbu shia l'ẹka Chileke? L'ọ nwekwaru ndu mpfuchiru wufuru dzuru mgboko nta-a epfu iphe, Chileke epfuduru. ² Sụ-a; wakwa g'unu e-gudeje maru Unme ọphu shi Chileke l'ẹka baa. Iphe, bukpo onye pfukpọwaru l'edzudzu-ọha sù lẹ Jizọsu Kéreshi byaru-a bya aburu nemadzu eviya lẹ mgboko-a; unu amaru lẹ Unme, bu onye ono l'ẹhu bụa Unme, shi Chileke l'ẹka. ³ Iphe, bukpo unme te ekwejedu epfu lẹ Jizọsu Kéreshi byaru-a bya aburu nemadzu lẹ mgboko; unu amaru l'unme k'ono te eshidu l'ẹka Chileke. Unme k'ono bụ unme k'onye ono, bụ iya bụ ọchi-nta-Kéreshi. ?Ọ kwa l'unu nūmawaru l'onye-achi-nta-Kéreshi ono e-mechaa bya? Ọ byaakwaru. Ọ nọakwa lẹ mgboko anọno.

⁴ Obenu lẹ-a; unwu mu; unubedua shikwa lẹ Chileke. Unu mekpeakwaru phẹ. Noo kele onye bu unu l'ime kakwaa onye bu lẹ mgboko-a ọkpehu. ⁵ Sụ-a; ẹphe shikwa lẹ mgboko-a; opfu ẹphe epfu shi lẹ mgboko-a; ndu mgboko-a nọdu anuru phẹ opfu. ⁶ Anyibedua bụ ke Chileke. Ọ

bùru ndu maru Chileke bù ndu ekweje lẹ k'anyi bù iya. Ndu abùdu kẹ Chileke te ekwejedu lẹ k'anyi bù iya. Nokwa g'anyi egudeje makaharù unme ire-lanù yẹle unme ntuphu-ire.

Chileke bù n-yemobu

⁷ Ndu mu yeru obu; unu g'anyi tũko yee nwibe anyi obu l'eye obu shikwa l'ẹka Chileke; tẹmanu onye yeru nwibe iya obu bẹ bũkwa onye Chileke nwũru; tẹme ọ bũru onye maru Chileke. ⁸ Onye te eyejedu nwibe iya obu ta amakwa Chileke; kẹle Chileke bũkwa eye obu l'onwiya. ⁹ Gẹ Chileke gude goshi anyi gẹ ya yeberu anyi obu bù l'o ziru Nwa iya lanù, ọ nwũru kpoloko; g'ọ bya lẹ mgboko g'anyi eshi iya l'ẹka dzũru ndzũ. ¹⁰ Ẹka n-yemobu ọwa-a gude shia iche bù lẹ-a; ọ tọ bũdu l'ọo anyibedua yeru Chileke obu; ọ bũchia Chileke bẹ goshiru l'ọo yẹbedua yeru anyi obu. G'o gude goshi iya bù l'o woru Nwa iya ye g'ọ bya eworu onwiya gwee ẹja ọha; gude gwefu iphe-ẹji, anyi meru.

¹¹ Ndu mu yeru obu; eshinu Chileke yeberu anyi obu ẹgube ono bẹ ọ gbakwarù-a anyi g'oniyemoye eyegbaa nwibe iya obu. ¹² Chileke bẹ o tokọ dũ-swekwaa onye hũmajewaru iya nũ. Obenu lẹ-a; anyi -yewaa nwibe anyi obu; ọo ya bù Chileke ebukwanũru anyi eburu l'ẹhu; tẹme n-yemobu Chileke edzuhukwaaphọ oke l'ẹhu anyi.

¹³ Lẹ Chileke nũkwaru anyi Unme nkiya gẹdegede. Ọ bũru Unme ono, ọ nũru anyi ono meru g'o gude anyi maru lẹ Chileke bu ebubu l'ime anyi; tẹme anyibedua bukwaruphọ

l'ime iya. ¹⁴ Tẹme anyi hụmawaa l'ẹnya; bya epfuru iya onyemonye sụ ị Nna yeru Nwa iya g'ọ bya aburu Onye-Ndzoṭa unwu eliphe. ¹⁵ Oo ya bụ l'onye dūwaru ike pfuru l'edzudzu-ọha; pfua ị Jizosu bụ Nwa Chileke bẹ a maerupho ị Chileke buwa iya ebubu l'ẹhu; tẹme onye ọbu bukwarupho l'ẹhu kẹ Chileke. ¹⁶ Sụ-a; anyi maakwaru ị Chileke yeru anyi obu; anyi bya ewowaru onwanyi ye iya l'ẹka; opfu l'anyi kwetarụ l'o yeru anyi obu eviya.

Chileke bukwa n-yemobu l'onwiya. Oo ya bụ l'onye gude n-yemobu buru bẹ buwa ebubu l'ime Chileke; tẹme Chileke bukwarupho l'ime onye ọbu. ¹⁷ Iphe e-goshi ị n-yemobu dzuru oke l'ẹhu anyi bụ l'obu e-shihu anyi ike mbọku ikpe ono. Noo l'ọo gẹ ndzụ Kéreshi dū bụ gẹ ndzụ anyi dūkwapho ị mgboko-a. ¹⁸ N-yemobu te enwedu ndzụ-agugu. N-yemobu, ọphu dūebe ree agbejehikwa chifu iphe, bukpo ndzụ-agugu g'ọ ha. Noo ị nemadzụ -nọdu eme iphe; ndzụ nọdu agụ iya; bẹ ọ maru l'aa-hụ iya ahụhù. Oo ya bụ l'onye ono ndzụ agụ ono bẹ n-yemobu iya adūebe ree.

¹⁹ Anyi yeru iya obu; kẹle o vururọ ụzo yee anyi obu. ²⁰ Teke ọ bụ ị nemadzụ bẹ nwanna iya dū ashi; l'ẹka onye ọbu sụkwaru ị ya yeru Chileke obu; ọ kwa ụka bẹ onye ọbu dzuru. ? Denu g'ọ bụ onye yee ya bụ nwanna, bụ onye ọ hụmaru l'ẹnya bẹ o to yeduru obu; ọ buchiaru Chileke, ọ tọ hụmaduru l'ẹnya bẹ ọo-gbẹ yechia obu. ²¹ Jizosu l'onwiya tūkwaru ekemu-a sụ g'onye yeru Chileke obu yekwaapho nwanna iya

obu.

5

Okoo, anyi atụ ekpu iphe mgboko

¹ Sụ-a; iphe, bukpo onye kwetaru l'oo Jizosu bu Onye-Ndzota obu, Chileke kweru ukwe le ya e-zi g'ọ bya obu; onye ono buakwaa nwa Chileke. Ozo bu l'onnyemonye, bu onye yekpowaru onye nwuru nwa obu l'atukojekwa onye obu yee nwa iya obu yee obu. ² Anyi -yee Chileke obu bya emeje ekemu, o turu; oo ya bu anyi amaru l'anyi yeru unwu Chileke obu. ³ Le g'anyi e-shije goshi l'anyi yeru Chileke obu bukwaa emeje iphemiphe, Chileke turu l'ekemu su g'e meje. Ophu iphe, o turu l'ekemu iya obu abukwa l'ootsu l'ehu ememe. ⁴ Onnyemonye, Chileke nwuru; alwu-kpeje iphe mgboko; ka iya ike. O buru l'oo l'anyi wowaru onwanyi ye Chileke l'eka meru iphe, anyi lwu-kpewaru iphe mgboko; turu okoo kpua ya. ⁵ Mbu-a; ?bu onye du idagha bu onye atuje okoo kpua iphe mgboko? ?Tobudu onye kwetaru l'oo Jizosu bu Nwa Chileke?

Anoru Jizosu l'ekebe

⁶ O kwa Jizosu Kereshi bu onye ono, byaru nu ono. Teke o byaru be bu mini be o gude bya; bya egudekwapho mee. Mbu-a; o to budu mini kpoloko be o gude bya; o gude mini bya egude mee gude bya. Onye egoshi l'iphe ono bu eviya bu Unme Chileke; kele oo Unme Chileke l'onwiya bu okpobe-opfu ono. ⁷ Kele ephe du eto agba ekebe l'imigwe. Ndu ono bu Nna; yele Opfu-Chileke; yele Unme-du-Nso. Ephe n'eto ono

tugbaru buru nanu. ⁸ Eṗhe dukwapho ẹto agba ekebe l'eliphe. Ndu ono bu Unme Chileke yeḗle mini waa mee. Eṗhe n'ẹto tukoru tugba nanu. ⁹ Anyi ekwetajẹ ekebe, nemadzu agba. Ekebe, Chileke agba gbẹkwa kabaa eshihu ike. Ono buru gẹ Chileke gude egoshi lẹ Jizosu bu Nwa iya. ¹⁰ Oo ya bu l'onye wowaru onwiya ye Nwa Chileke ono l'ẹka bẹ ekebe ono duwaa l'okpoma. Onye te ewokwanuru onwiya ye Chileke l'ẹka bẹ meakwaru iya onye ntuphu-ire; keḗle o to kwedu l'ekebe Chileke agba lẹ k'ẹhu Nwa iya bu eviya. ¹¹ Ekebe ono bu lẹ Chileke nuru anyi ndzu ojejoje; waa lẹ ndzu ono bu l'ẹhu Nwa iya bẹ o shi. ¹² Onye yeḗ Nwa iya ono tugbaru buru nanu bẹ nweakwa ndzu ono; ophu onye yeḗ Nwa iya ono atugbaduru buru nanu enwekwanu ndzu ono.

Ndzu ojejoje

¹³ Su-a; iphe-a, mu ede-a bukwa unubedua, unu lẹ Nwa Chileke tugbaberu buru nanu-a bẹ mu ederu iya; g'unu amakwanuru l'unu nwewaru ndzu ojejoje ono. ¹⁴ Obu eshihuje anyi ike l'iphe Chileke; noo l'onumaje olu anyi me o -buru l'iphe, anyi suru g'o nu anyi bẹ anyi pfuru g'o du iya l'uche. ¹⁵ O n'iya bu l'eshinu anyi maru l'onumaje olu anyi l'iphe, bukpo iphe, anyi suru g'o nu anyi; bẹ anyi maanaru-a l'anyi natawaru iphe, anyi suru g'o nu anyi obu.

¹⁶ O -duru onye humaru nwanna iya ẹka oome iphe-eji, abudu e -mee ya; l'o gbua onye meru iya nu; g'onye ono pfukwaru nu Chileke gẹ Chileke woru ndzu nu nwanna iya ono, meru iphe-eji

ono. Nokwapho iphe, Chileke e-me l'ehu ndu eme iphe-ẹji, du ẹgube ono. O dukwanuru iphe-ẹji ophu bu e -mee ya; l'oogbua onye meru iya nu. Mu ta asukwaru g'e pfuje nu Chileke k'ẹgube iphe-ẹji k'ono. ¹⁷ Iphe, bukotakpoo iphe, e meru l'uzo, apfuduru-oto buakwaa iphe-ẹji; olo o dukwarupho iphe-ẹji ophu abudu e -mee ya; l'oogbua onye meru iya nu.

¹⁸ Anyi maru l'onnyemonye, Chileke nwuru te emejedu iphe-ẹji. Kele Nwa ono Chileke nwuru ono anoduje eleta onye obu ẹnya okpobe eleta; k'ophu Onye-Njo ono, bu Obutuswe tee byidu iya ẹka.

¹⁹ Anyi maakwaru l'anyi bu ke Chileke; le ndiphe mgburugburu be Onye-Njo ono, bu Obutuswe turu gburumu swiswia.

²⁰ Ophu anyi makpodaru bu le Nwa Chileke byaru; anyi bya amakwarupho l'o meru g'ẹnya sahu anyi; k'ophu anyi byaru bya amaru onye ono, bu iya bu okpobe Chileke ono. Onye ono bu okpobe Chileke ono be anyi l'iya tugbaru buru nanu. O buru onye o shi l'eka bu Nwa iya ono, bu Jizosu Kereshi. Yebedua, bu Jizosu Kereshi bu okpobe Chileke ono; bya aburu iya bu ndzu ojejoje ono l'onwiya.

²¹ Unwegirima mu; unu te ekwejekwa g'o duru iphe, unu ahaje g'o bya anochia ẹnya Chileke l'ime okpoma unu.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d